

Oleh : DATUK SERI SYED HAMID ALBAR
Tempat : BANGI , SELANGOR DARUL EHSAN
Tarikh : 21 MEI 2003
Tajuk : UCAPAN SEMPENA SEMINAR "MEMPERTAHANKAN MARUAH DAN KEDAULATAN NEGARA: MENANGANI AGENDA SERANTAU DAN ANTARABANGSA" ANJURAN ALUMNI KELAB-KELAB UMNO LUAR NEGARA

"HAL EHWAL ANTARABANGSA DAN DIPLOMASI MALAYSIA MASA KINI : PROSPEK DAN CABARAN"

Pengerusi Majlis

ASSALAMUALAIKUM WARAHMATULLAHI WABARAKATUH

Bersyukur kita ke hadrat Allah S.W.T. kerana dengan limpah kurniaNya kita dapat bersama-sama di perjumpaan pada hari ini yang saya harapkan dapat memberi manfaat kepada semua yang hadir.

2. Saya ingin mengucapkan terima kasih dan penghargaan kepada pihak penganjur kerana sudi mengundang saya ke majlis yang amat bererti ini dan sekaligus memberi peluang kepada saya untuk mengemukakan pandangan saya mengenai ceramah bertajuk "Hal Ehwal Antarabangsa dan Diplomasi Malaysia Masa Kini : Prospek dan Cabaran".

3. Saya berani menyatakan bahawa tidak banyak negara di dunia yang sentiasa telus, dalam banyak hal, untuk jangka masa yang lama, seperti Malaysia. Setelah lebih 45 tahun merdeka, kita harus berasa bangga bahawa pelaksanaan dasar luar Malaysia telah dapat dilaksanakan dengan jayanya. Namun cabaran dan ancaman masa kini datang dari berbagai aspek dan bentuk dan adalah penting bagi negara bersiap sedia untuk menanganinya.

Kepentingan Negara

4. Saya ingin menggariskan cabaran pertama iaitu perlanjutan kepentingan negara. Kesemua negara di dunia mempraktikan premis tersebut dalam penggubalan dasar luar hubungannya dengan negara lain. Bagi Malaysia, amat penting agar usaha serta langkah yang kita ambil adalah berpandukan objektif menjamin keselamatan serta kemakmuran negara dan juga menentukan keamanan di rantau Asia Tenggara terus berkekalan. Harus ditekankan bahawa kepentingan negara kita sebenarnya amat meluas dan tidak hanya tertakluk kepada isu keamanan dan keselamatan semata-mata bahkan melibatkan juga kegiatan ekonomi negara.

5. Dunia yang kita hidup sekarang amat jauh berbeza dengan semasa kita mencapai kemerdekaan. Dunia globalisasi masa kini memerlukan kepantasan akses kepada sumber maklumat. Aliran modal antarabangsa dan operasi syarikat multinasional melintasi persempadanan sesebuah negara. Negara-negara kuasa besar telah mula kehilangan sebahagian dari kebebasan kuasa mereka. Kita sekarang hidup dalam dunia di mana terdapat kurangnya kawalan dan lebih kebebasan.

6. Rakyat Malaysia aktif serta bebas menjalankan urusan mereka di luar negeri. Hampir 700,000 rakyat Malaysia termasuk pelajar pula bermastautin di luar negara. Menyedari betapa pentingnya negara terus maju dan produktif, Kerajaan mengamalkan dasar ekonomi terbuka dan bercorak antarabangsa. Sektor pembuatan merupakan tunggak utama ekonomi negara dan kebanyakan barangan yang dihasilkan adalah untuk eksport. Sebagai sebuah negara dagang, Malaysia perlu menjalin hubungan baik dengan dunia luar. Malaysia harus terus aktif dan sentiasa berwaspada bagi memastikan kepentingannya tidak tergugat. Kedaulatan negara merupakan tunggak utama sistem perhubungan antarabangsa. Oleh itu, pengendalian dasar luar negara perlulah mencerminkan keadaan yang sedemikian rupa. Namun, kita akur bahawa Malaysia sebuah negara kecil dan walaupun suara kita lantang terdengar di persada antarabangsa, Malaysia perlu bekerjasama dengan negara-negara dunia lain dalam usaha mengutarakan kedudukan kita berasaskan kepentingan negara.

Kerjasama Serantau - ASEAN

7. Walaupun anggota ASEAN tidak sentiasa sehaluan, dan pencerobohan Amerika Syarikat (AS) ke atas Iraq merupakan satu contoh yang paling ketara, saya tetap berpendapat bahawa kita tidak boleh membelakangkan ASEAN. Ia harus terus menjadi tunggak kesejahteraan dan kemakmuran rantau ini. Penting supaya ianya juga merupakan tumpuan utama anggota ASEAN yang lain.

8. Diimbangi kembali, masalah kegawatan ekonomi yang melanda Asia pada tahun 1997-98 telah sedikit sebanyak melemahkan kerjasama ASEAN. Akibatnya, negara-negara anggota ASEAN memberi lebih tumpuan ke atas masalah politik, sosial dan ekonomi negara mereka sendiri, sementara isu-isu wilayah kurang mendapat perhatian. Sehingga kini ASEAN masih belum lagi memperolehi kepaduan dan kesatuan yang pernah menjadi kebanggaannya.

9. ASEAN sebenarnya bukan sahaja berpotensi untuk menjadi pasaran kepada barangan dan perkhidmatan, bahkan ia berpotensi menjadi destinasi atau tuan rumah kepada perdagangan, usahawan dan juga dana asing. Potensi ASEAN untuk menjadi sebuah pasaran wilayah bersepadu masih belum tercapai lagi. Namun, persetujuan yang diberikan oleh semua anggota ASEAN untuk mengorak langkah ke arah penubuhan wilayah perdagangan bebas terbesar di dunia dengan menyatukan ASEAN dan China amat dialu-alukan. ASEAN dan Asia Timur amnya harus menggembeng tenaga dan berusaha meluaskan pengaruhnya di pasaran antarabangsa. Tanpa kerjasama, kita akan tercicir dalam kancah persaingan sejagat dan seterusnya tersisih begitu sahaja.

Masalah Ekonomi

10. Salah satu ancaman luar yang paling penting dan komprehensif yang terpaksa kita tempuhi ialah isu ekonomi. Setiap negara berhak mencorakkan pelaksanaan pembangunan ekonomi masing-masing. Namun demikian, negara sedang membangun seringkali dikaburi dengan ancaman globalisasi dan liberalisasi. Ada kalanya globalisasi, liberalisasi, sistem perdagangan dan pembangunan didalangi dengan berbagai bentuk perlindungan perdagangan (trade protectionism) seperti alam sekitar dan undang-undang buruh. Langkah-langkah unilateral dan pengenaan kuota dan tarif yang bertujuan untuk mengawal pasaran dan membataskan perdagangan bebas telah membawa kesan negatif kepada pasaran. Negara kurang maju dan negara sedang membangun tidak mempunyai daya saing untuk mempromosikan barangan dan kepentingan di pasaran global. Pengutaraan permasalahan mereka di forum antarabangsa pula terjejas oleh kerana sering memperolehi bantuan kewangan atau bergantung sepenuhnya dengan bantuan kewangan negara-negara maju.

11. Di peringkat antarabangsa, Malaysia bersama-sama dengan negara yang sehaluan, terus memperjuangkan kerjasama pembangunan ekonomi antarabangsa. Kita sering menggesa agar dipertingkatkan bantuan kepada negara kurang membangun, penurunan kadar hutang, pemindahan teknologi, pengurangan jurang digital dan kaedah perdagangan yang setara. Kesemuanya ini adalah bertujuan untuk mengurangkan jurang di antara negara kaya dengan negara miskin.

12. Dasar prosper thy neighbour bagi menggalakkan kerjasama ekonomi di antara Malaysia dengan negara jiran juga telah diperluaskan penggunaannya kepada sektor swasta. Malaysia akan terus mencari usahasama, kesatuan perdagangan dan perkongsian pintar (smart partnership) dengan negara lain di peringkat kerajaan dan swasta bagi mengenalpasti peluang-peluang ekonomi demi keuntungan bersama.

Globalisasi

13. Seperti negara dunia lain, Malaysia terpaksa berhadapan dengan globalisasi - dunia tanpa sempadan. Kemajuan teknologi komunikasi dan kemudahan penerbangan telah menjadikan dunia semakin kecil. Sesetengah pihak bertanggungjawab bahawa Malaysia tergolong ke dalam kumpulan yang dianggap menentang globalisasi akibat kedudukan yang diambil oleh Malaysia dalam isu spekulasi matawang dan sikap Malaysia menentang penyangak matawang dalam krisis kewangan yang melanda Asia.

14. Malaysia sebenarnya menyokong takrif menyalurkan pelaburan dari negara maju ke negara membangun tanpa sekatan. Yang kita khawatiri adalah cubaan membawa globalisasi ke satu tahap yang boleh menghakis kebebasan sesebuah negara berdaulat untuk membuat keputusan sendiri dalam melaksanakan agenda negara.

Malaysia ingin melihat perdagangan saksama dan bukannya kebebasan perdagangan tanpa batas.

15. Sementara kita menerima globalisasi, kita percaya bentuknya masih boleh diperbaiki. Malaysia mahukan globalisasi yang lebih adil dan seimbang yang memberi manfaat kepada semua warga dunia, baik negara kaya mahupun negara miskin. Globalisasi tidak sepatutnya menggugat kedaulatan sesebuah negara dalam hak menentukan dasar dalaman masing-masing. Ia harus dilaksanakan secara berperingkat-peringkat bagi membolehkan negara-negara membangun meningkatkan kedudukan mereka agar mampu bersaing.

16. Oleh itu, amat penting bagi rakyat Malaysia memiliki daya saing yang tinggi, bersedia menghadapi dan menangani segala bentuk cabaran globalisasi. Persediaan ini bukan sahaja sebagai benteng bersaing dengan syarikat-syarikat gergasi dunia, tetapi juga untuk merebut peluang di pasaran antarabangsa yang akan terbuka dengan lebih luas lagi di masa yang terdekat ini.

17. Sebagai contoh, di antara perkembangan globalisasi yang akan memberi cabaran juga peluang kepada negara dalam masa terdekat ini ialah pelaksanaan sepenuhnya perjanjian kawasan perdagangan bebas ASEAN (AFTA) yang ditandatangani negara-negara anggota ASEAN pada tahun 1992. Ianya bertujuan untuk mewujudkan satu pasaran integrasi bagi ASEAN yang mempunyai penduduk lebih dari 500 juta orang. AFTA juga bertujuan untuk meletakkan ASEAN sebagai satu kawasan yang berdaya saing tinggi dan menarik untuk pelaburan asing. Pelaksanaan sepenuhnya AFTA akan meningkatkan persaingan di kalangan negara-negara serantau, apabila setiap negara berusaha menjadi lebih kompetitif bagi menarik pelaburan asing. Penurunan tarif akan menjadikan barangan buatan negara-negara jiran di mana kos pengeluarannya lebih rendah menjadi lebih murah.

18. Sama ada sedar atau tidak, rakyat Malaysia sebenarnya sedang mengharungi arus globalisasi ini. Arus ini akan terus mencorakkan struktur ekonomi dan sosial rakyat Malaysia di masa hadapan. Justeru, kita perlu lebih prihatin dan peka kepada cabaran serta peluang yang dibawa arus globalisasi ini.

Keganasan

19. Peristiwa serangan 11 September ke atas AS telah meninggalkan kesan mendalam kepada seluruh penduduk dunia. Malaysia menyertai negara-negara lain dalam mengutuk keganasan kerana ia bukan cara untuk menyelesaikan masalah. Kita tidak menafikan bahawa terdapat banyak ketidakadilan di dunia, dan ini perlu diperbetulkan. Tetapi ia hendaklah diusahakan melalui tindakan yang tidak menjadikan mangsa orang yang tidak bersalah.

20. Jika kita tidak ingin melihat tindakan keganasan, dunia hendaklah sensitif dan memberi perhatian kepada ketidakadilan dan penindasan yang berlaku. Keganasan tidak mungkin dihapuskan dengan hanya memburu dan membunuh penganas.

Serangan di Bali, di Riyadh dan di Casablanca baru-baru ini membuktikan bahawa keganasan akan terus menular. Kita telah dari awal-awal lagi melafazkan kebimbangan kita bahawa kerakusan AS dengan agendanya tersendiri terhadap Iraq akan menyemarakkan lagi sentimen dunia Islam. Selagi ada penindasan dan penaklukan satu-satu kaum oleh kaum dan bangsa lain, akan ada orang yang terdesak dan akan sanggup mengganas. Dunia harus menyelesaikan sebab-sebab mengapa mereka mengganas.

21. Bagi yang ekstrem di dunia Islam, salah satu dorongan utama untuk mengganas adalah sebagai respon kepada tindak tanduk Israel (yang disokong AS) menyerang rakyat Palestin. Selagi sempadan Israel tidak ditentukan dan wilayah Palestin yang dirampas oleh Israel tidak dikembalikan, selagi hasrat Palestin untuk menubuhkan negaranya sendiri tidak kesampaian, keganasan tidak mungkin luput.

22. Dalam dunia dicengkam keganasan, kita harus bersyukur bahawa Malaysia terus diakui oleh banyak negara dan pihak sebagai sebuah negara Islam yang berpegang teguh kepada kesederhanaan ajaran Islam yang sebenar. Imej Islam yang diserang dapat dipulih sedikit dengan kestabilan, keharmonian antara kaum dan penganut agama yang berlainan serta kemajuan yang ketara di Malaysia. Kita dapat membuktikan bahawa Islam dan demokrasi tidak semestinya bercanggah.

23. Rakyat Malaysia daripada semua lapisan masyarakat perlu menghargai keadaan yang terdapat di negara kita. Kestabilan dan kemajuan negara kita dicapai melalui dasar, perancangan dan usaha yang mengambilkira sensitiviti pelbagai kaum yang berlainan di negara ini, keadaan sumber manusia dan sumber alam, dan punca-punca kekayaan yang sedikit yang kita warisi.

Pencerobohan AS dan sekutunya ke atas Iraq

24. Izinkan saya untuk memanjangkan isu keganasan dan menyentuh pula mengenai pencerobohan AS dan sekutunya terhadap Iraq. Hadirin semua maklum bahawa Malaysia menentang pencerobohan AS tersebut berpandukan prinsip undang-undang antarabangsa dan Piagam PBB. Kita tidak mahu melihat badan dunia itu dibelakangkan dalam hal keamanan dan sekuriti antarabangsa. Malaysia berpegang kepada prinsip penyelesaian sebarang pertikaian secara aman dan menentang sebarang tindakan unilateral. Serangan pre-emptive AS telah membuka landasan yang merbahaya dalam hubungan antara negara. Sehubungan ini, saya ingin menarik perhatian hadirin sekalian kepada beberapa kesan penting berhubung pencerobohan AS tersebut.

Kesan terhadap Pertubuhan Bangsa-Bangsa Bersatu (PBB)

25. Pencerobohan ke atas Iraq oleh AS dan sekutunya telah menyebabkan perpecahan antara anggota-anggota masyarakat antarabangsa. Keadaan ini telah meninggalkan kesan yang mendalam terhadap PBB, prinsip-prinsip undang-undang antarabangsa dan sistem multilateralism yang selama ini menjadi tunjang hubungan

antara negara. Sekiranya berlarutan, perkembangan di atas akan membawa kepada ketidakstabilan sistem antarabangsa, dan ini akan membawa kesan buruk kepada negara-negara kecil seperti Malaysia yang bergantung kepada undang-undang antarabangsa sebagai jaminan keselamatan dan kesejahteraan, baik dari segi politik, ketenteraan mahupun ekonomi. Lebih mengecewakan, PBB dikatakan tidak lagi efektif atau relevan kerana kuasa-kuasa besar boleh berbuat apa sahaja.

26. Pentadbiran Bush telah menunjukkan dengan jelas bahawa sikap tidak endah tersebut menjadi salah satu tunggak dasar luarnya. Hakikat ini dibuktikan melalui keengganan kerajaan AS menandatangani Protokol Kyoto Mengenai Perubahan Cuaca, tindak tanduk mereka yang telah melemahkan sistem perlucutan senjata antarabangsa serta usaha mereka untuk melemahkan Mahkamah Jenayah Antarabangsa.

Kesan terhadap Pergerakan Negara-Negara Berkecuali (NAM)

27. Amat mendukacitakan, NAM sendiri tidak sepakat dalam isu Iraq. Semasa Sidang Terbuka Majlis Keselamatan (MK) PBB untuk membincangkan situasi tersebut pada 26-27 Mac 2003, negara-negara NAM mengutarakan pendirian yang berbeza.

28. Perpecahan ini akan menyukarkan lagi ikhtiar Malaysia untuk menjadikan NAM sebagai sebuah Pergerakan yang dihormati di pentas antarabangsa. Dalam usaha menangani perkembangan tersebut, Malaysia sebagai Pengerusi NAM telah mengambil inisiatif untuk mengadakan Mesyuarat Peringkat Menteri-Menteri Luar Troika NAM untuk membincangkan kedudukan dan masa depan Iraq di Paris pada 2-3 Mei 2003 lalu.

Penyekutuan Semula Kekuasaan (Realignment of Power)

29. Tindakan AS dan sekutunya menceroboh Iraq telah ditentang sekeras-kerasnya oleh Perancis serta Jerman, dibantu Rusia dan China. Namun, adalah tidak jelas sama ada perkembangan yang disaksikan merupakan penyekutuan semula kuasa besar ataupun merupakan perpecahan yang bersifat sementara. Ini mungkin akan bergantung kepada tindak tanduk AS dalam konteks post war Iraq.

30. Walau bagaimana pun, apa yang disaksikan selepas kemenangan AS dan sekutunya adalah perubahan kedudukan negara-negara seperti Perancis yang menunjukkan tanda-tanda bahawa mereka ingin berbaik semula dengan AS. Sebagai contoh, Perancis adalah antara yang terdahulu mencadangkan agar sekatan terhadap Iraq digantung sebagai langkah pertama dalam proses pembatalan sekatan tersebut.

Kesan terhadap Usaha Menentang Keganasan Antarabangsa

31. Pencerobohan AS dan sekutunya juga telah memberi impak negatif terhadap usaha AS dan masyarakat antarabangsa untuk menentang keganasan antarabangsa. Walaupun pada peringkat kerajaan usaha akan tetap dijalankan seperti biasa, namun

kesan negatif akan dirasakan pada tahap masyarakat awam, terutamanya di Asia Barat. Sungguhpun demikian, Kerajaan mahukan kerjasama dua hala antara Malaysia dan AS dalam hal ini berjalan seperti biasa.

Kesan Terhadap Sekatan Ke Aras Iraq

32. AS kini sedang melobi anggota MK PBB untuk meluluskan satu resolusi membatalkan kesemua sekatan terhadap Iraq. Apa yang kita kawatiri adalah pembatalan sekatan yang bertujuan memberi keuntungan kepada AS kerana hasil penjualan minyak Iraq akan digunakan untuk membiayai pembinaan semula negara tersebut. Walau apa jua bentuk pemerintahan post-war Iraq, AS dijangka akan mendapat 'habuan' (spoils of war) yang besar memandangkan kerajaan baru Iraq akan dipengaruhi oleh AS dan firma-firma AS bersama sekutunya dijangka memonopoli konsesi dalam bidang minyak dan gas.

33. Rusia pula menegaskan bahawa resolusi-resolusi MK PBB mestilah dilaksanakan sepenuhnya, yang bermakna pemeriksaan-pemeriksaan senjata PBB harus kembali ke Iraq sebelum sekatan tersebut dibatalkan. AS, sebaliknya, berpendapat bahawa pihak bersekutulah yang mempunyai tanggungjawab untuk mengesahkan kewujudan WMD, manakala United Kingdom (UK) menyatakan adalah terlalu awal untuk membenarkan pemeriksaan-pemeriksaan tersebut kembali ke Iraq.

34. Berdasarkan kepada penekanan AS untuk menukar rejim di Iraq melalui peperangan, PBB perlu diberikan peranan dan tanggungjawab untuk mentadbir Iraq dalam proses peralihan pemerintahan sepertimana yang berlaku di Afghanistan dan Timor Leste. Peranan dan tanggungjawab ini tidak boleh diserahkan hanya kepada AS dan sekutunya sahaja kerana ia boleh mengakibatkan kemarahan dan penentangan rakyat Iraq. Namun draf resolusi yang diperkenalkan AS di MK PBB tidak memberikan keutamaan bagi PBB.

35. Malaysia mahukan PBB diberi peranan utama dalam membaik pulih negara tersebut. Namun, kita tidak mahu peranan PBB kelak dilihat sebagai mengiktiraf pencerobohan AS ke atas Iraq. Malaysia juga mahukan pembatalan sekatan terhadap Iraq dilakukan berlandaskan prosidur yang sedia ada di MK PBB.

Reaksi AS terhadap Malaysia

36. Saya ingin menyatakan bahawa pihak AS sedia maklum akan pendirian Malaysia dalam isu pencerobohannya ke atas Iraq. Sementara AS mengiktiraf hak Malaysia untuk menyuarakan pandangannya, mereka telah memohon bantuan kita untuk mengurangkan retorik tersebut kerana dikawatiri ia akan menyumbang ke arah sentimen anti-Amerika.

37. Walaupun hubungan perdagangan Malaysia-AS memanfaatkan kedua-dua belah pihak, sebarang kerenggangan hubungan akibat isu Iraq akan lebih banyak

merugikan Malaysia daripada AS. Namun demikian, AS perlu mengambil kira bahawa Malaysia adalah sebuah negara Islam yang moderate dan komited untuk menentang keganasan. Kerajaan juga telah bersetuju menubuhkan South East Asia Regional Center for Counter Terrorism yang akan berkerjasama dengan banyak negara dalam usaha membendung keganasan. Sekiranya AS menghargai faktor ini, Malaysia akan terus dianggap sebagai rakan pentingnya di rantau ini.

38. Wajar ditekankan bahawa Malaysia bukan anti-AS. Malaysia cuma berpandukan prinsip-prinsip undang-undang antarabangsa dan Piagam PBB dan tidak mahu melihat badan dunia itu dibelakangkan dalam hal keamanan dan sekuriti antarabangsa.

39. Malaysia baru sahaja keluar dari belenggu Krisis Kewangan Asia yang melanda pada tahun 1998. Malaysia harus bertindak secara praktikal demi memelihara kesejahteraan dan kemakmuran negara dan mengelak dari diperangkap oleh AS yang mungkin bertindak drastik lantas memusnahkan ekonomi negara yang baru lepas dari krisis kewangan. Respons setiap negara terhadap peperangan di Iraq ini adalah berdasarkan kepentingan negara masing-masing. Malaysia juga mempunyai kedudukan yang sama.

40. Disamping itu, kita juga perlu sensitif dan berusaha untuk tidak menyinggung perasaan negara-negara Arab tertentu walaupun mereka menyokong AS. Kita tidak mahu menimbulkan reaksi yang boleh menjejaskan kehadiran ketua negara atau kerajaan mereka ke Sidang Kemuncak Pertubuhan Persidangan Islam (OIC) di Kuala Lumpur pada bulan Oktober depan. Sebagai Pengerusi OIC yang akan datang, Malaysia memerlukan sokongan dari negara-negara Teluk khususnya. Oleh yang demikian, Malaysia perlu mengambil jalan tengah serta mengambil pendekatan yang seimbang dalam hubungan kita dengan negara-negara Arab.

Kesimpulan

41. Tatalaku hubungan luar Malaysia setelah hampir setengah abad merdeka jelas menunjukkan kematangan. Malaysia kini dikenali ramai dan dijadikan sebagai contoh bagi negara membangun. Demikianlah penghormatan yang diberi kepada Malaysia sehingga jumlah perwakilan asing yang ditauliahkan ke Malaysia sudah melebihi seratus negara, dengan lebih daripada 80 bermastautin di Kuala Lumpur. Pemimpin-pemimpin negara asing sering membuat lawatan rasmi dan tidak rasmi ke Malaysia untuk menjalin hubungan yang erat dan bekerjasama dengan kita dalam arena antarabangsa.

42. Kita tidak memihak kepada mana-mana blok tetapi berbaik-baik dengan semua negara di dunia. Sikap bebas serta keyakinan kita menyuarakan pendapat tidak disenangi oleh pihak tertentu. Media asing kadangkala berpandangan negatif - imej negara diperburukkan, dan pandangan pelabur dan pelancong terhadap Malaysia cuba dipesongkan. Namun, mereka yang berpeluang datang ke Malaysia melihat dengan mata sendiri betapa tidak tepatnya laporan media terhadap kita dan mereka dapat memperbetulkan imej Malaysia di kalangan rakan dan kenalan mereka.

43. Negara-negara yang sedikit masa dulu mencemuh kita kerana kononnya kita tidak demokratik, tidak adil dan sebagainya, hari ini berusaha memperbaiki hubungan mereka dengan kita. Masalah tertentu sudah tidak lagi disebut oleh mereka.

44. Saya telah menggariskan sebahagian besar dari cabaran serta prospek yang dihadapi oleh Malaysia di arena hal ehwal antarabangsa sempena perjumpaan kita hari ini. Jalan penyelesaian kepada permasalahan tersebut bukan sahaja terletak di tangan para diplomat dan pegawai Kerajaan semata-mata. Keberkesanan pengaruh Malaysia di arena antarabangsa bergantung kepada kekuatan dan pengaruh politik, ekonomi dan ketenteraan negara kita. Kita semua bertanggung jawab dan harus memainkan peranan. Yang paling penting, dalam menangani dasar luar Malaysia kita hendaklah berpandukan kepada kepentingan nasional dan strategik negara. Dalam masa yang sama, beberapa prinsip yang tertentu dan pendirian yang pragmatik adalah diperlukan memandangkan perubahan-perubahan yang berlaku di arena antarabangsa. Selain daripada itu, kita juga jangan lupa bahawa kemerdekaan, kebebasan, globalisasi, demokrasi dan hak asasi manusia kesemuanya mempunyai peranan untuk mencorakkan hubungan antarabangsa kerana negara-negara sekarang adalah saling bergantung antara satu sama lain.

Terima kasih.

WASSALAMUALAIKUM WARAHMATULLAHI WABARAKATUH.